

四

教

義

四教義卷第三

隋天台山修禪寺沙門智顗撰

復次上所引經論之文。非佛菩薩意耶。次明其念處。觀大智論。觀身爲苦。因緣生道。若有漏。若無漏。受心法。念處亦如是。解者不同。有師解云。其善五陰諸善心數法。合明念處。若南嶽師解。卽是九想背捨勝處。諸對治觀門。助正道。開三解脫。故名爲其念處。故經云。亦當念空法。修心觀不淨。是名諸如來。甘露灌頂藥。服者心無憂。得至涅槃岸。此卽是其念處之明文也。言空法者。毗曇有門。止觀生空。名爲空。修心觀不

淨者。卽是初背捨。不壞內外色相。不內外滅色相。以是不淨心觀外色。是名初背捨。從初背捨。習不淨觀。不淨觀有二種。一小不淨觀。二大不淨觀。破淨顛倒。內無色相。入二背捨。乃至成就八背捨。八勝處。十一切處。九次第定。師子奮迅超越三昧。觀欲界入初禪。皆見不淨。破淨顛倒。是名其身念處觀。受心法念處。亦如是也。次明緣念處觀者。智論云。一切色法。名之爲身。十入及一入少分。名之爲身。六種受爲受。六識爲心。想行二陰及三無爲名法。解者不同。有師解。通一切所觀境界。皆名緣念處觀。有言十二因緣境。有

言慈悲所緣境。若南嶽師解。緣佛說教所詮一切陰入界。四諦事理名義。言語音辭。因果體用。觀達無闕。能生四辯。於一切法。心無所疑。成無疑解脫。是緣念處觀也。七明別相四念處位者。有三種根性不同。若慧解脫根性。別相四念處。但修性念處。若俱解脫根性。修性念處。亦修其念處。若無疑解脫根性。俱修三種念處。或別相念處。若能於別相念處中。生四種精進。名四正勤。修四種定。名四如意足。五種善法生。名之爲根。善法增長。遮諸煩惱。名之爲力。分別道用。名七覺分。安隱道中行。名八正道。若入八正道。卽能觀

四諦成別相四念處也。三明總相念處位者。有人言。其念處卽是總相念處。今謂不爾。應作四句分別。一者境別觀亦別。二者境別而觀總。三者境總而觀別。四者觀總境亦總。初境別觀亦別。正是別相性四念處位。次境別觀總。境總觀別。此二卽是總相四念處之方便。四觀總境亦總。此觀若成。卽是總相四念處之位。今明境總觀總。卽是總上所明性念處所觀五陰。作一身念處。觀此身污穢不淨。及苦無常無我。破淨顛倒。及三倒也。是名總相性身念處。是總身念處。觀或總二陰。或總三陰。或總四陰。或總五陰。具釋云。

云。受心法念處亦如是。總相共念處。總相緣念處。亦如是。類之可解。是名總相四念處位。此位亦有三種。根性類別相念處可知。若有方便。卽入總相念處位。若無方便。卽非總位也。云何有方便。若於總相念處之中。具足修總相正勤如意足根力覺道。皆如性四念處中說。但以總相善法深細爲異耳。若安隱入正道中行。卽能觀四諦。是得性法念處。故能生於暖法。故智論云。八正道中行。初得善有漏五陰。名爲暖法。當知有方便者。已得三十七品也。問曰。八正見道。七覺修道。今何念處位中說耶。答曰。毗婆沙論云。若八

正在前。七覺在後。決定是無漏。若七覺在前。八正在後。通有漏無漏也。此三賢人位。竝名乾慧地。未得善有漏五陰相似理水。定水未沾。故名爲乾。而悉有觀行。能伏諸見。故名爲慧。住持能生善法。名之爲地。名乾慧地。亦名外凡人也。四明暖法者。是善五陰。是智慧性。生聖智火。故名暖法。行者因善方便。總相四念處。唯緣法念處。依六地定。瞿沙說暖頂。亦依七地。初發善有漏五陰等智。似解得十六智火之氣分。名之爲暖。亦四正勤也。譬如鑽火。暖氣若發。卽有烟相。用念處觀鑽五陰境。發智慧暖。起正勤烟。故名暖法也。

又如冬冰春陽氣動則有消融之相。暖法解發身邊六十二見冰執漸覺消融也。涅槃云得暖法人七十三人我弟子有外道則無。以佛法有別相總相四念處觀能破一切諸見顛倒故得暖法。十八種六師雖各稱一切智人戲論破慧眼不見於真實故法華云深著虛妄法堅受不可捨我慢自矜高諂曲心不實於千萬億劫不聞佛名字亦不聞正法。如是人難度是故舍利弗我爲說方便說諸盡苦道當知外人如此執見罪障深重豈得生暖法也。末法多學問坐禪之人不能如是修習念處執著諍競者亦同外人之

過。尚不能生暖法之善。大乘功德終不發也。略說暖位竟。五明頂法位者。亦是善五陰。亦智慧性。在暖法之上。名之爲頂。證暖法已。用正方便。正憶念。勤修增進。暖法善根。依六地定。亦依七地。若暖法增長。次生善根。名爲頂法。緣四諦十六行。得四如意足定。見四諦分明。如登山頂。觀矚四方。悉皆明了。故明頂法。若生法愛。卽頂墮也。六明忍法位者。亦是善五陰。亦智慧性。於四諦堪忍欲樂。名忍法位。於頂法位。用正方便。勤修增進。頂法善根。依六地定。若頂法善根增進。卽生柔順忍。亦緣四諦十六行。爾時信等五種善法。

竝得成根。以慧根故。於四聖諦。堪忍欲樂。故名忍法。
忍法有三品。下忍於十六行作法諦觀。中忍十番縮
觀。上忍但觀欲界苦下四行。隨觀一行。若下中二品
忍。雖起煩惱惡業。而不受三塗報。緣受人天百千生。
若上品忍成。但有人天七生業。在增上一剎那。卽入
世第一法也。問曰。暖頂亦堪忍。何故不名堪忍。答曰。
若通論四善根。亦名四忍。但忍法不退。別受忍名。若
暖法遇惡因緣退。能造五逆。謗方等經。作一闡提。墮
無間地獄。若頂法遇惡因緣退。雖不斷善根。猶作五
逆等罪。今此忍法。智強惑弱。諸惡所不能動。以忍力

大故。一切惡心。非數緣滅。如師子王。餘獸遠避也。問曰。若暖頂退者。云何名性地。答曰。此人雖造惡墮地獄。一入受罪。竟終不重入。有性地善根故。能得聖果。是故經云。寧爲調達。不爲鬱頭藍弗。調達造三逆罪。墮於地獄。出生人中。得辟支佛。諸根猛利。過舍利弗也。七明世第一法位者。於凡夫所得最勝善根。名爲世間第一法也。亦是善有漏五陰。亦智慧性。上忍一剎那。依六地定。以生一剎那最勝善根。名世間第一法。此一剎那具足五力。苦下四行。隨緣一行。一剎那不住。故似見道。所以者何。行人有二種。一愛行。二見

行愛行有二種。一我慢。二懈怠增。見行亦二種。謂我及我所著我慢者。修無常行。入世第一法。懈怠增者。修苦行。入著我者。修無我行。入著我所者。修空行。入彼總相念處。次第生決分。世間善有九品。下下中下上名暖法。中下中名頂法。中上上下下名忍法。上上名世間第一法。若觀陰無常等善根名暖法。觀三寶功德名頂法。觀察聖諦名忍法。觀苦聖諦次第聖道名世間第一法。暖法若退法捨。若命終捨。若度欲界地捨。頂法亦如是忍法無退法捨。餘二捨同上。世第一法一剎那無捨。復次是四善根人皆用性緣法。

念處修道亦是四念異名也。卽一得一失。更受勝名之義也。毗婆沙解釋世第一法。遂有數十家異釋不同。七賢名義無量。豈凡所知也。問曰。七賢之位。前淺後深。何故偏釋乾慧地。不委分別性地。答曰。乾慧地最淺。如上分別。已自難知。非世能正是初心所學也。正分流一切佛法行人。卽目急用。一切學問坐禪之人。所迷沒處。須略分別也。若入性地。解慧自生。非凡能測。多言妄說。何必承信。所以一家講經說法。必須委釋初心。若賢聖深位。但點章而已。其坐禪者。略知佛法大意。卽須覺悟無常。懺悔行道。豈可馳逐不急。

之言其欲講說利物。得此正意分明。名相有所不達。更自尋訪。略說七賢位竟。二明七聖位者。一隨信行。二隨法行。三信解。四見得。五身證。六時解脫羅漢。七不時解脫羅漢。此七位通名聖者。聖以正爲義。卽練道懸鏡也。苦忍真明。捨凡夫性。得入聖人性。真智見理。斷於同類之因。故名爲聖。此七聖人。復有二種不同。謂學無學。前五種聖人。悉是學人。後二種聖人。是無學位也。言學人者。始從苦法忍。發得真智。自爾方有聖人也。有聖諦具有漏無漏二種五陰。見聖迹故。名爲學人。於諦不推求。故名無學人也。又無學人者。

眞智見理既極。三界正使已盡。無惑可治。不須更學。四眞智也。復就七聖之位。分爲三道。所謂見道。修道。無學道。一見道者。卽是八正道見理。斷見諦惑。至十五心。如破石方便也。二修道者。卽是七覺分。隨觀一諦。所斷思惟。如斷藕絲方便也。三無學道者。如前分別也。一明信行位。卽是鈍根人入見道之名也。所言鈍者。非自智熏。憑他生解。名爲鈍也。是在方便道先。雖有信。以未發眞。不名爲行。行以進趣爲義。從得苦忍眞明。十五剎那。進趣見眞。名隨信行。故說但有近行人。無遠行人。又若在十五心中命終。無有是處。苦

法忍者。欲界見斷十使。對治是法。是則初無漏無閼道也。復次世間第一法。次第不作。不向不行。以能捨邪業。邪趣。邪見也。又復世間第一法。分別苦法忍。作五種定。謂地定。行定。緣定。剎那定。次第緣定。次第緣定者。世間第一法後。卽入苦忍也。雜心偈云。謂色無色苦。集滅道亦然。此法無間等。是說十六心。十五心。成屬見道。第十六心。卽屬修道也。若謂不應然者。如盡智成。亦不應屬無學道也。是信行人見道十五心。亦名八人地。八忍具足。智少一分也。卽是須陀洹向。亦名行中須陀洹也。二明隨法行位者。卽是利根人。

入見道之名也。言利根者。自以智熏見理斷結。故云利也。本在方便道中。能自用觀智。觀四真諦法。但未發真。不名爲行。因世間第一法發苦忍真明。十五剎那進趣見真。故名法行也。分別行類前行解釋可知。但鈍根憑他生解。智少觀察。利根自智多觀察爲異耳。三明信解位者。卽是信行人入修道轉名信解也。鈍根憑他信進發真解。故名信解。此信解人證果有三。一證須陀洹果。二證斯陀含果。三證阿那含果。一明信解證須陀洹果者。第十六道比智相應。卽證須陀洹果也。須陀洹天竺之言。此翻修習無漏。若成論

明猶是見道。若數人明義證果卽入修道。卽用此一往釋修習無漏義便也。若見使斷略說三結盡廣說八十八使盡名須陀洹。受生死七返終不至八生。二明信解證斯陀含果。卽有二種。一向二果。一向者從初果心後更修十六諦觀七菩提行現前。卽此世無漏斷煩惱。一品無閼斷欲界煩惱。一品二品無閼斷二品。乃至五品皆是斯陀含向。亦名勝進須陀洹。約此說家家也。二果者若斷六品盡證欲界第六品解脫卽是斯陀含果也。斯陀含天竺之言。此翻云薄欲界煩惱分爲九品。前六品盡餘三品在前斷已多。其

所未斷少。故名爲薄。三明信解人證阿那含。亦有二種。一向。二果。一向者。若斷欲界七品。乃至八品。皆是阿那含向。亦名勝進斯陀含。約此說一種子也。二名果者。九無閼斷欲界結證第九解脫。卽名阿那含果也。阿那含。天竺之言。此土翻云不還。此人欲界五下分結盡。更不還生欲界。故言不還也。復次須陀洹有三種。一行中須陀洹。卽是須陀洹向。二住果。正是須陀洹果也。三勝進。勝進須陀洹。亦名家家。卽是斯陀含向也。斯陀含。但有二種。一住果。二勝進。勝進斯陀含。亦名一種子。卽阿那含向也。阿那含亦二種。一住

果二勝進勝進阿那含進斷五上分結所謂色染無色染等結卽阿羅漢向也阿羅漢但有一住果問曰此說次第得果毗曇明超越得果云何分別答曰若凡夫時斷欲界六品乃至八品盡來入見諦道後發苦忍眞明十五心中是斯陀含向十六心卽證斯陀含果也若凡夫時先斷欲界第九品乃至無所有處盡後入見諦十五心名阿那含行第十六心卽證阿那含果此是超越人不證前二果也是信解人雖是利根而有五種根性不同所謂退思護住勝進也若證阿那含果復有五種般及七種般八種般五種般

者。一中般。二生般。三行般。四不行般。五上流般也。七種般者。開中般爲三種也。八種般者。五種如前。足現般。無色般。不定般也。四明見得位者。法行人轉入修道。名爲見得。是利根人。自以慧熏。見法得利。故名見得。是見得人在思惟道。次第證三果。超越得二果。亦如信解中分別。但以利根。不藉聞法。不假眾具。自能見法。得理爲異也。見得利根。但是不動根性。若證阿那含果。亦有五種般。及七種八種不同也。五明身證位者。還是信解見得。二人入思惟道。用無漏智。斷五下分結。故發四禪四無色定。卽用其念處。修八背捨。

八勝處。十一切處。入九次第定。三空定。事性兩障。先已斷盡。又斷非想事障。滅緣理諸心心數法。入滅盡定。得此定故。名身證。阿那含也。所以者何。入滅盡定。似涅槃法。安置身內。息三界一切勞務。身證想受滅。故名身證也。若約初果解身證者。但以先於凡夫用等智斷結。得四禪四無色定。後得見諦第十六心證。那含果。卽修其念處。還從欲界修背捨勝處。一切處入九次第定。成身證也。是阿那含有二種。一者住果。但是阿那含也。二者帶果行向。卽是勝進阿那含也。猶名那含行向故。卽是羅漢向攝。故智度論云。那含

有十一種。五種阿那含。正是阿那含。六種阿那含。阿羅漢向攝。當知此身證阿那含。卽是勝進阿那含。阿羅漢向攝。五種般那含。七種般那含。皆但有上流般八種般那含。但有現般。無色般也。如是阿毗曇約信解見得。分別數那含。乃至有一萬二千九百六十種。廢說大事。豈煩分別也。六明時解脫羅漢者。卽是信行鈍根。待時及眾緣具。方得解脫。故名時解脫。所言阿羅漢者。是天竺語。此土無翻。名含三義。一殺賊。二不生。三應供也。具此三義。位居無學。羅漢有五種。謂隨信行。生五種。退法。思法。護法。住法。及勝進也。彼得

二智。盡智無學智等見也。若用金剛三昧。於非想第九品。惑盡。次一剎那。證非想。第九解脫成盡智。次一剎那。得無學等見也。彼或時退。故不說得無生智。此五種阿羅漢。是信種性根鈍。因中修道。必假衣食牀具處所。說法及人。隨順善根增進。不能一切時所欲進也。是五種羅漢。各有二種。不得滅盡定。但是慧解脫。得滅盡定。卽是俱解脫。若不得滅盡定。是人因中。偏修性念處觀。不修其念處觀。若得滅盡定者。是人因中。修性念處觀。亦修其念處觀。若證果時。三明八解。一時俱得。故名俱解脫也。七明不時解脫阿羅漢。

者。卽是法行利根。名不動法阿羅漢。所言不時解脫者。不動法人。一向利根。因中修道。能一切時中。隨所欲進修善業。不待眾具。故名不時解脫也。是人。不爲煩惱所動。故名不動。是不退義。成就三智故。謂盡智。無生智。無學智等見。能用重空三昧。擊聖善法。以定捨定。故言能擊。是不動法阿羅漢。亦有二種不同。一不得滅盡定。但名慧解脫。二若得滅盡定。卽是俱解脫。若聞佛說三藏教門。修緣念處。卽發四辯。名無疑解脫。是名波羅蜜聲聞。能究竟具足一切阿羅漢功德也。問曰。是時不時。二人利鈍不同。云何竝得俱解。

脫也。答曰。此簡鈍利。明得有難易之殊。何關簡得與不得邪。此之七聖。名真沙門。沙門有二種。一者直言沙門。沙門卽因也。二者沙門那。沙門那者果也。沙門有八十九。所謂見諦八忍。思惟八十一。無闕也。就沙門那亦有八十九。所謂見諦八智。思惟八十一。解脫也。就沙門那復有二種。一有爲果。八十九有爲果也。二無爲果。八十九無爲果也。此約智斷。約智德明八十九有爲果。約斷德明八十九無爲果也。略說三藏教毗曇有門。明七賢七聖位大意竟。但賢聖義多有。所關毗曇有門。雖義無復是過。若欲分別究其支派。

必須讀毗婆沙也。問曰。前說乾慧之位。實與舊解殊途。次明性地見思無學。此與常人解釋未覺有異。答曰。若乾慧有異。卽性地見思無學皆悉異也。譬如生人死人。若一身分是生。一切身分皆悉是生。若一身分是死。一切身分俱死。死生之殊。豈非一切俱異。今明乾慧若如生人。則性地見思無學皆如生人。他明乾慧若如死人。則性地見思無學皆如死人。復次。今明乾慧若如死人。性地見思無學皆如死人。他明乾慧若如生人。性地見思無學皆如生人。當用智斷。合譬始終名相。如身身分。何曾不同。始終智斷。如生死之

異何得不異其得此意者。如人有目。日光明照見種種色。其迷此意者。如爲盲人設燭。何益無目者乎。此應次明三藏教空門入道二十七賢聖位者。信法二行。卽是兩賢。在方便道。空門發真。斷見惑未盡。行卽須陀洹。近向見惑盡。名須陀洹果。空解增明。斷欲界思惟一品。乃至五品。名斯陀含向。斷六品盡。卽是斯陀含果。斷七品八品盡。名阿那含向。欲界九品下分盡。卽是阿那含果。阿那含有十一種。帶果行向。卽是阿羅漢向。進斷上二界思惟也。非想九品盡。卽是阿羅漢果。是阿羅漢有九種。賢人有二。聖有二十五。合

有二十七賢聖具出成論。但事相煩多。廢說摩訶衍義。毘勒門非空。非有門經不委出。論不來此。豈可謬有所判。問曰。兩門不度。不可懸判。空門明義。勝阿毗曇。何故捨勝用劣。答曰。毗曇雖劣。而是佛法根本。是故佛去世後。流傳利物。且又大乘經論。破小用小。多取毗曇有門。少用空門。故須略出毗曇有門。佛法根本。賢聖之位次也。第二明三藏教辟支佛乘位者。三藏教詮生滅十二因緣之理。明辟支佛義。亦應具有四門。今但約薩婆多宗。明有門辟支佛乘位。卽爲五意。一翻譯。二分別大小。三明宿緣。四明觀法。五料簡。

一翻譯者卽爲二意。一翻名。二解釋。一翻名者。辟支迦羅。是天竺之言。此土翻爲緣覺。此人宿世福德。神根勝利。學十二因緣以悟道也。二解釋者。大智論云。緣覺有二種。一獨覺。二因緣覺。一明獨覺。辟支迦羅者。若佛不出世。佛法已滅。是人先世因緣。能獨出智慧。不從他聞。自以智慧得道。故名獨覺。如大智論明有一國王。出園遊戲。清旦見樹林花果鬱茂。甚可愛樂。時王食已。卽便偃臥。王諸綵女皆競採花。毀折林樹。時王覺已。見林毀壞。內心覺悟。一切世間。無常變壞。皆亦如是。思惟是已。無漏道心。朗然開發。斷諸結

使成辟支迦羅。具六神通。卽飛到閑靜處。山林清曠。入深禪定。受無爲樂。二明因緣覺者。是人道根淳熟。藉小因緣而能覺悟也。如見林壤。因此覺悟。成辟支佛。大智論意。似用此爲因緣覺也。今明因緣覺者。因聞十二因緣。覺悟成辟支佛也。十二因緣有三種不同。一者三世十二因緣。二者二世十二因緣。三者一世十二因緣。三世破斷常。二世破我。一世破性也。一明三世十二因緣者。過去二因。現在五果。現在三因。未來二果。過去二因者。謂無明行。現在五果。謂識名色六入觸受。現在三因者。謂愛取有。未來二果者。謂

生老死憂悲苦聚。是爲三世合明十二因緣。是十二因緣有三種道。一煩惱道。二業道。三苦道。是三道更互爲因緣。從無始已來。生死不絕。至於今身。若不修觀智。未來流轉。憂悲苦惱。無有邊際。若修觀智。則無明滅。乃至老死憂悲苦惱皆悉滅已。譬如千年闇室。若不置之一燈。其室方將永闇。若置之一燈。則故闇皆滅。新闇不生也。若聞此十二因緣發真無漏。則無明滅。乃至生老死憂悲苦聚皆滅。是名因緣覺也。二次明二世十二因緣者。出大集經。佛爲求辟支佛人說也。此十二因緣。現在有十。未來有二。有解。現在有

九。未來有三。現在十者。一無明。大集經云。何爲觀於無明。先觀中陰。入父母所。生貪愛心。愛因緣故。四大和合。精血二滲。合成一滲。大如豆子。名歌羅邏。是歌羅邏有三事。一命。二識。三煖。過去世中。業緣感果。無有作者。及以受者。初息出入。是名無明。歌羅邏時。氣息入出。有三種道。所謂隨母氣息上下。七日一變。息入出者。名爲壽命。是名風道。不臭不爛。是名爲煖。是中心意。名之爲識。善男子。若有欲得辟支佛果者。當觀如是十二因緣。二行者。復觀三受。因緣五陰。十二入。十八界。云何爲觀。隨於念心。觀息出入。觀於內身。

皮膚肌肉筋骨髓腦如空中雲是身內風亦復如是。有風能上有風能下有風能滿有風能焦有風增長是故息之出入名爲身行以出入息從覺觀生故名意行和合出聲名口行也三者識三行因緣則有識生故名爲識四名色者著識因緣則有四陰及以色陰故名名色五六入者五陰因緣識行六處故名六入六觸者眼色相對故名爲觸乃至意法皆亦如是七受者觸因緣故念色至法名之爲受八愛貪著於色乃至於法名之爲愛九取愛因緣故四方求覓名之爲取十有者取因緣故受於後身故名爲有此下

二因緣屬未來也。十一生者。有因緣故有生。是名爲生。十二老死。生因緣故。則老死種種諸苦。是名五陰。十二入十八界。十二因緣之大樹。若聞此因緣發真無漏。亦名因緣覺也。備說具出大集經。三次明一念十二因緣者。此但約現在隨一念心起。卽具足十二因緣。亦出大集經。爲辟支佛人說。此因緣也。經曰。因眼見色而生愛心。名爲無明。爲愛造業。名之爲行。至心專念名識。識色共行。名爲名色。六處生貪。是爲六入。因入求愛。名之爲觸。念色至法。名之爲受。若心貪著名之爲愛。求是等法。名之爲取。此等法生。名之爲著。

有次第不斷名之爲生。次第斷故名之爲死。生死因緣。眾苦逼切。名之爲惱。乃至意法生貪。亦復如是。是十二因緣。一人一念。悉皆具足。若聞此因緣。心開意解。發無漏慧。亦名因緣覺也。瓔珞經又出十種十二因緣。若隨聞一種。發真無漏。皆名因緣覺也。今不備出。故涅槃經云。譬如老人年百二十。不堪付金。意在此也。問曰。獨覺亦得悟上來。所說諸因緣。不答曰。皆繇前生之宿習也。問曰。若依三種因緣。教得無漏智。卽是稟教緣覺。名利根聲聞云。何生聞等三慧耶。又問何等爲生得慧。何等爲方便慧耶。少答。二明分別。

大小不同者。此二種辟支迦羅。皆有大小不同。今明
獨覺辟支迦羅。具有二種。一者本是學人。在人間生。
是時無佛。佛法已滅。或須陀洹。七生既滿。不受八生。
自悟成道。是人不名爲佛。亦非羅漢。名曰小辟支迦
羅。若論其道力。或有不。如舍利弗等大羅漢也。二者
大辟支迦羅。於二百劫中。作功德。增長智慧。得三十
二相分。或三十一相。或三十相。二十九相。乃至一相。
於九種阿羅漢中。智慧利勝。於諸深法。總相別相。能
知能入。久修習定。常樂獨處。有如是相。名大辟支迦
羅也。皆歷三種十二因緣。十種十二因緣。分別小大

也。若因緣覺分別小大亦如是。三明宿緣者。今此小大二種獨覺辟支迦羅宿植不同。或於前世若偏修性念處。觀十二因緣。善根淳熟。生無佛世。因於遠離自然獨覺。成小辟支迦羅也。若於宿世修性共二種念處理事。善根淳熟。獨覺自悟。具足三明八解脫。具六神通。成大辟支迦羅也。而其不發四無閤辯者。禪定是內證。習因符慧而發。名義是外發。故雖有宿習而不得發。皆約三種十二因緣。十種十二因緣。分別宿習因緣也。若生佛世。聞生滅十二因緣三藏之教。卽發四辯。還名羅漢。在聲聞眾數。猶如迦葉舍利弗。

等皆是辟支根性人也。亦名辟支佛。若不爾者。那得
 次爲求辟支佛乘說十二因緣。此人說不值佛。亦自
 得道。故法華經云。若人有福。曾供養佛。志求勝法。爲
 說緣覺。皆因緣覺也。根性三種十種宿緣不同可知。
 四明觀法者。十二因緣有二種。一者觀屬愛十二因
 緣。二觀屬見十二因緣。一觀屬愛十二因緣者。卽爲
 二意。一推尋。二觀破。一推尋者。是人聞正因緣生滅
 之法。信解分別。覺一切屬愛煩惱。皆是十二因緣。觀
 因緣入定。欲息心達本源。求自然慧樂。獨善寂修習
 定心。得諸禪定。住此定中。知屬愛煩惱。卽是無明。逆

順推尋卽見十二因緣。云何逆推。此貪愛因何而生。卽知因受。受因何生。卽知因觸。如是觸因何而生。卽知因六入。六入因名色。名色因識。識因於行。行因無明。過去一切煩惱也。復順推此愛。愛能生取。因取則成有業。因此有業。則有未來二十五有之生。因生有老死憂悲苦聚。輪轉無際。若因停心觀入深禪定。如是逆推尋。或時見歌羅邏初受生。乃至見過去身起業煩惱。乃至二生百千生也。順尋取有。若因禪定之力。或見未來一生二生。乃至十百千生。若見過去未來事。其心悲感。道心精熟。轉復增感也。二明觀破麤

愛十二因緣者。卽是性念處。歷別觀十二因緣也。性念處觀略如前說。所以者何。若觀愛。卽污穢五陰性念處。若觀受觸六入名色識。卽是觀果報無記五陰性四念處。若觀於行。卽是善不善五陰性四念處。若觀無明。卽是過去污穢煩惱五陰性四念處。若觀于取。卽是現在污穢五陰性四念處。若觀於有。卽是善不善五陰性四念處。若觀未來生老死。卽是報生無記性四念處。是則用四念處。逆順觀察十二因緣。破四顛倒。顛倒若滅。卽是無明一切煩惱滅。以無明滅。故行滅。乃至老死憂悲苦惱滅。是明性四念處。歷別

觀屬愛煩惱十二因緣之觀也。二次明觀破屬見煩惱十二因緣者。亦爲二意。一者推尋。二者觀破。一推尋者。若見神及世間常。無常。亦常亦無常。非常非無常。是則現在生身邊四見。因此身邊四見。生十四難。六十二見。此身邊四見。卽是四取。逆順尋此四取。逆尋四取。四取因四愛。四愛因四受。四受因四觸。四觸因四入。四入因四名色。四名色因四識。四識因四行。四行因四種無明。復順尋四取。四取能生四有。此四有卽受一切二十五有生老死憂悲苦惱。若因停心觀得深禪定。或見過去未來生事。具如前說也。二明

觀破。用性四念處觀。觀四取身邊四見。如是次第。乃至無明破過去如去。不如去。亦如去。亦不如去。非如去。非不如去。身邊二見。污穢五陰也。又順觀有四取。乃至未來生死。破有邊。無邊。亦有邊。亦無邊。非有邊。非無邊。身邊二見。污穢五陰。若能如是用性四念處。破三世身邊二見之四見。卽破十四難六十二見。一切屬見煩惱。一時皆滅。是名無明滅。卽行滅。乃至老死憂悲苦惱皆滅。若屬見煩惱滅。卽還用前觀愛十二因緣。性念處觀。破欲愛。色愛。無色愛。皆滅。是則三界煩惱業道滅者。名爲有餘涅槃。若苦道滅者。卽是

無餘涅槃。是名用性念處智慧。觀十二因緣入涅槃也。性念處觀法。略如前說。故經云十二因緣。其義甚深難解難見。意在此也。如佛說大涅槃經。時有一外道名曰富那。問世尊言。瞿曇。汝云何令我知神及世間常。乃至非常非無常。佛答言。汝若能畢故不造新。卽能知神及世間常。乃至非常非無常。梵志卽言。我已知竟。佛問汝云何知。梵志答言。故名無明。新名取有。若知無明不起。取有。卽知神及世間者常。乃至非常非無常。是時梵志求哀出家。爲佛弟子也。又中論明聲聞經入第一義。並約觀十二因緣。破六十二見。

入第一義。若深得此意。不止破外道也。若佛弟子學問坐禪。發種種見。取著諍論。起諸煩惱。二十五有生。死之業。皆是屬見。十二因緣也。覺知者。能用性念處。檢破。卽得解脫。其迷此者。十二因緣。流轉生死。無有邊際。故中論云。眞法及說者。聽者難得。故如是卽生死。非有邊無邊也。其念處緣念處助觀。十二因緣。類前可知也。五明料簡者。問曰。若宿習自然覺悟者。何須佛爲說。十二因緣。答曰。聞說則疾得。不說自悟少遲。如果熟。雖應自墮。若須急取。薄搖卽落。問曰。辟支佛乘。何意不制果。答曰。聲聞人鈍。故制果。若辟支佛。

久習智慧。神根利。故不須制果。譬如二人共行。其身
羸者。須止息處。若身强者。直到所在。故佛但說辟支
佛道。不立果位也。復次。總相斷結。智慧羸。故但除正
使。名聲聞乘。別相觀因緣。智慧細。故侵除習氣。名辟
支佛。復次。聲聞鈍。故先觀苦諦。緣覺利。故先觀集諦
也。問曰。聲聞念處。別相爲羸。總相爲勝。今何故總相
爲羸。別相爲勝。答曰。還用別總。歷別細觀。十二因緣
故。別爲勝也。復次。聲聞功德。禪定力淺。天眼極遠。但
見小千國土。辟支佛久種善根。禪定力深。若發天眼。
乃過三千。見他方世界。略明三藏教有門。緣覺位竟。

空門如成論分別。毘勒門。非空非有門。論旣不度。則不可知也。

四教義卷第三

四教義卷第四

隋天台山修禪寺沙

第三約三藏教明菩薩位者。三藏教理明菩薩藏亦應具有四門。今約毗

菩薩位。卽有四意。一翻譯。二釋位。三料簡。四釋淨無垢稱義。第一翻譯。所言菩薩摩訶薩者。是天竺語。若具依彼言。應云菩提薩埵摩訶薩埵。但諸師翻譯不同。今不具述。而智度論翻云。菩提名佛道。薩埵名成眾生。摩訶言大。此人用諸佛大道成眾生也。又師翻云。菩提名道。薩埵名心。摩訶名大。是爲大道心。而諸

經多云菩薩摩訶薩者。什師以天竺語煩。兩句八字標名。故除三字。畱五字。合爲一句。名菩薩摩訶薩也。但三乘菩提。通名爲道。而菩薩獨受大名者。以其緣四諦。起慈悲。四弘誓願。上求佛果。下化眾生。此心曠大。故別受摩訶薩埵之稱也。第二釋菩薩位。略爲七意。一發菩提心。二行菩提道。三種三十二相業。四六度成滿。五一生補處。六生兜率天。七八相成道。一發菩提心者。如釋迦牟尼菩薩。於過去世爲陶師。值釋迦牟尼佛。供養彼佛。又見彼佛智慧第一弟子。名舍利弗。神足第一弟子。名目犍連。多聞侍者。名曰阿難。

爾時陶師供養佛已。卽便發菩提心。作是誓願。願未來世。我得作佛。還名釋迦牟尼。智慧弟子名舍利弗。神足弟子名目犍連。多聞侍者還名阿難。佛可其願。從是初發菩提心。卽慈悲四弘誓願發也。但三藏教慈悲四弘誓願。皆緣生滅四諦而起。所言慈悲心者。一大慈心。欲與愛見二種眾生道滅之樂也。二大悲心。欲拔愛見二種眾生苦集之苦也。四弘誓者。一未度者令度。卽是度天魔外道。愛見二種六道眾生。未度三界火宅之苦諦。令得度也。二未解者令解。卽是愛見二種眾生。未解愛見二十五有業。令得解也。三

未安者。令安卽是愛見二種眾生。未安三十七品一切諸道。令安道諦也。四未涅槃者。令得涅槃。卽是愛見二種眾生。未滅二十五有生死因果。皆令得滅諦涅槃也。若緣愛見二種眾生。生滅緣四諦而起慈悲。四弘誓願者。卽是菩薩初發菩提心也。知愛見四諦。故智慧勝諸天魔。一切外道。有慈悲誓願功德。故勝一切聲聞緣覺。故大智度論云。初發心已爲天人師。勝出一切聲聞及一切也。二行菩薩道者。卽是三阿僧祇劫行六度也。從過去釋迦牟尼至罽羅尸棄佛時。名一阿僧祇劫。從此常離女人身。爾時不自知我。

當作佛不作佛。此初阿僧祇劫。卽是得五停心別相。總相念處之位。用性念處共念處緣念處行六度也。三種念處義略如前說。所以者何。修性念處爲壞屬愛魔業。破屬見一切智六師。修共念處欲壞愛結。破神通六師。修緣念處爲一切愛見眾生說法。屬愛壞故。一切天魔眷屬壞見壞故。三十六種六師及一切外道眷屬壞也。故用三種念處行六波羅蜜。意欲降伏天魔。制諸外道。菩薩用三種念處行六度時。雖修性念處而不斷結。爲生三界度眾生故。常欲多修共念處。觀爲得神通。成四攝法。同事調伏。愛見眾生。

又常多修緣念處觀。爲欲成四辯。說三乘法。化一切
愛見眾生。共出三界火宅也。是初阿僧祇劫。修行六
度。用四弘誓願。安撫生死眾生。心無怯弱。故壞女人
之業。常受丈夫之身也。爾時未發暖解。位在外凡。故
不自知。已身當作佛。不作佛。次明闍那尸棄佛。至然
燈佛。爲二阿僧祇劫。是時菩薩。用七莖青蓮花。供養
然燈佛。敷鹿皮衣。布髮掩泥。時然燈佛。便授其記。汝
當來世。必得作佛。名釋迦牟尼。爾時菩薩。雖能自知
我必作佛。口不稱我當作佛。謂此是用暖法智慧。修
六度也。所以者何。因總相四念處。初得善有漏五陰。

卽是性地順忍初心之位。既有證法之信。故必知作佛。而用暖解法。修行六度。心未分明。故不向他說。次從然燈佛至毗婆尸佛。爲第三阿僧祇劫滿。是時菩薩。內心了了。自知作佛。口自發言。無所畏難。我於來世。當得作佛。今謂此是頂法之位。行六度四諦。觀解分明。如登山頂。四顧分明。了了自知作佛。亦向他人說也。三明過三阿僧祇劫。種三十二相業者。今謂此是入下忍之位。用此忍智。修行六度。成百福德。用百福德成一相。以爲三十二相之業因也。種三十二相業因。於下忍之位。修六波羅蜜。成百福之相。以爲三

十二相業因也。是三十二相。於欲界閻浮提人中。受男子身。佛出世時。緣佛身相。故得種也。問曰。所言百福得成一相者。幾功德成一福德耶。答曰。異解不同。難可定判。有人言。是福不可稱量。不可譬諭。是菩薩入三阿僧祇劫。心修大行。種是三十二相因緣。以是故福無能量。唯佛能知。問曰。菩薩幾時種三十二相。答曰。極遲百劫。極疾九十一劫。弗沙佛觀釋迦菩薩自生。弟子熟。彌勒菩薩自熟。弟子生。多人難度。一人易化。故弗沙佛於寶窟中。放光照釋迦。釋迦菩薩尋光至弗沙佛所。於七日七夜。一心觀佛。目不暫眴。但

用一偈稱歎云。天地此界多聞室。逝宮天處十方無。
丈夫牛王。大沙門。尋地山林徧無等。以苦行力。超越
九劫。在彌勒前成。正覺也。四明六波羅蜜滿者。問曰。
檀波羅蜜云何滿。答曰。一切能施。無所遮礙。乃至以
身施時。心無所惜。如尸毗王。以身施鵠。解剔皮肉。雖
受痛苦。舉身上秤。以贖鵠命。心不悔恨。立誓自證。我
心無悔者。身可平復。既立誓已。天地震動。身還如故。
如是等菩薩。本生捨身命施。心不退悔。是檀波羅蜜
滿也。問曰。尸波羅蜜云何滿。答曰。不惜身命。護持淨
戒。如須陀摩王。是王精進持戒。常依實語。與劫磨沙。

陀大王其期乞駕還國七日。供養沙門竟。卽來就終。是王期滿。爲持實語戒故。赴期就死。是則爲持一戒。不惜身命。如是等處處因緣經。說本生菩薩因地持戒捨身。心無悔恨。卽是尸波羅蜜滿相。問曰。羼提波羅蜜云何滿。答曰。若人來罵。撻捶割剝。支解奪命。心不起瞋。如羼提比丘常修慈忍。在林樹下。入禪三昧。時迦梨尸王。爲女色故。生重弊妬。截其手足耳鼻。心忍不動。時王問言。今截解汝身。定能忍不。比丘答言。實不瞋恨。王言。誰信汝耶。比丘答言。我若實忍。心不瞋恨。當令我身。卽尋平復。說是語時。身卽如故。如是。

等不惜身命。修行忍辱。是名羣提波羅蜜滿相。問曰。毗梨耶波羅蜜云何滿。答曰。若有大心。如大施太子。爲一切眾生。入海採寶。從龍王得如意珠。欲將還閻浮提。雨衣服寶物。布施眾生。海神惜珠。因其睡臥。卽盜取其珠。將還海宮。太子覺已。爲此珠故。誓以此身。杼大海水。令海乾盡。從神索珠。心定不懈。帝釋天感太子心。爲物精勤。不惜身命。卽將諸天助杼海水。水遂減半。海神怖故。慚愧還珠。亦如釋迦菩薩。值弗沙佛。七日七夜。翹一足。目不暫眴。如是等不惜身命。爲物精進。卽名毗梨耶波羅蜜滿相。問曰。云何名禪波

羅蜜滿相。答曰。如一切禪定自在。又如尙闍梨仙人坐禪時。無出入息。鳥於螺髻中生子。不動不搖。乃至鳥子飛去。是名禪波羅蜜。滿相問曰。般若波羅蜜云何滿。答曰。菩薩大心分別。如劬嬪婆羅門大臣。分閭浮大地作七分。若干大城小城聚落村民盡作七分。般若波羅蜜亦如是。是菩薩般若波羅蜜滿相。今謂此皆下忍智慧。能調伏諸根。滿足六度也。所以者何。下忍智慧力强。煩惱力弱。用此智慧修行六度。能忍六蔽。不惜身命。成六度也。四波羅蜜滿。正是性念處力。至下忍也。禪波羅蜜滿。多是其念處力。至下忍也。

般若波羅蜜滿。正是緣念處力。至下忍也。問曰。羅漢
尚不能不惜身命。修行六度。下忍智慧之力。何能成
六度耶。答曰。若無慈悲誓願。積劫修行之力。羅漢智
慧尚不能爾。何況下忍。今外緣慈悲誓願。久殖熏修。
內有忍法智慧。助破六蔽之力也。五住一生補處。卽
是釋迦菩薩。生在迦葉佛所。爲補處弟子。淨持禁戒。
行諸功德。迦葉授記。次當作佛。恐此在中忍之位也。
六生兜率陀天者。捨閻浮之報。上生此天。爲諸天師。
在於此天。用三種念處。修八勝處。爲欲伏結清淨。下
閻浮提。神通變化。降伏天魔。四辯說法。破諸外道。及

一切眾生也。此猶屬中忍之位。問曰。菩薩何意從初發心伏結。至此伏而不斷耶。答曰。若斷結。卽不得受生化物。觀無常伏結。令諸煩惱脂消。用清淨心。修六度。令諸功德肌長也。七下生成道者。卽是三藏教明八相成菩提果也。所言八相成道者。一從兜率天下。二託胎。三出生。四出家。五降魔。六成道。七轉法輪。八入涅槃。一兜率天下者。菩薩將欲下生時。用四種觀人間。一觀時。卽是人壽百歲。是佛出世之時。二觀土地。諸佛常依中國。生迦維羅衛。卽是百億日月之中也。三觀種姓。生二種姓中。一刹利姓。勢力大故。二

婆羅門姓。智慧大故。釋迦牟尼佛。生刹利姓也。四觀
生處。何等母人。能懷那羅延力菩薩。唯中國迦毗羅
婆淨飯王后。能懷後身菩薩。如是思維已。從兜率天
下問。何故作白象形非餘。二明處胎。卽是正慧入母
胎。一切眾生。邪慧入母胎。菩薩憶念不失。故名正慧
入母胎。中陰住。則知中陰入胎時。知入胎。歌羅邏時
知歌羅邏。七日赤白精血合。安浮陀時。二七如鰾狀。
伽陀時。三七日如凝酪。五胞時。出生時。皆憶念不失。
是名正慧入母胎。復次。餘人住中陰。欲受生時。於父
母所。生顛倒心。生不淨心。菩薩不爾。正慧明識父母。

相續入胎。是名正慧也。三明出胎相者。是菩薩滿足十月。正慧不失念。從右腋而出胎。生墮於地。卽行七步。口自發言。天上天下。唯我爲尊。當初生時。國內卽有三十二瑞事。在瑞應經具明。乃至將示相師阿夷相太子身。具三十二相。八十種好。卽便悲淚。王恐不祥。問阿夷曰。我子不祥。故悲淚耶。仙人答曰。吉無不利。太子相好分明。其若在家。當作轉輪聖王。飛行皇帝。王四天下。十善化世。其若出家。必成自然之佛。度脫萬姓。但太子相好分明。必不在家作轉輪聖王。其若出家。必得菩提。度脫天人。傷吾年老。不覩佛興。故

悲淚耳。所以用三十二相八十種好莊嚴其身。欲爲得三菩提之品器也。問。何故現相三十二。好有八十。答。成佛莊嚴法如此故。四明出家者。是時菩薩年漸長大。出四城門。見老病死苦。厭怖心生。夜半踰城出家。六年苦行。食難陀婆羅門石蜜乳糜。益身十六功德。五明降魔相者。卽於菩提樹下。破萬八千億鬼兵魔眾。魔王敗績。鬼兵退散。六成道相者。魔眾散已。攝心端坐於第四禪。住中忍。修觀成中忍。一剎那上忍。一剎那世第一法。一剎那發真無漏三十四心。得阿耨多羅三藐三菩提三十四心者。八忍八智。九無礙。

九解脫也。具足佛十力。四無所畏。十八不共法。三達無礙。三意止。大慈大悲。四無礙智。一切諸法總相別相。悉知故名爲佛。第九解脫具足一切種智。竝在未來。故名小乘佛。七明轉法輪相者。於鹿野苑爲拘鄰五人。三轉生滅四諦法輪。天人得道。此爲證。三寶於是現世間。次說十二因緣法輪。次爲菩薩說六波羅蜜法輪。是則開三乘之教。名修多羅藏。十二年後。佛在毗舍離國。爲須鄰那迦陀長者子作姪欲。以是因緣。結初大罪二百五十戒。次佛在舍婆提城。告諸比丘。諸有五怖五罪五怨。不除不滅。是因緣故作此世。

未來受無量苦。是名佛自說毗曇教。從此轉三藏法輪。乃至涅槃。教三乘弟子。是名轉法輪也。八明入涅槃相者。於拘尸那城娑羅雙樹間。逆順出入超越三昧。於第四禪中。入火光三昧。燒身滅度。唯留舍利。爲人天福田。身智俱滅。入無餘涅槃。是爲聲聞經中說大乘之位也。次第三明料簡者。問曰。聲聞經開三乘。何故二乘卽生斷結。菩薩從初發心。乃至降魔。都不斷結。答曰。聲聞緣覺。厭患生死。自求涅槃。不爲利物。是故貪取眞斷結盡。則不受生。入涅槃也。菩薩大慈憐愍。欲度一切受生死苦。教化眾生。眾生出世善根。

淳熟。即便成道。說三乘教。其三乘人。同入涅槃。若因
 中斷結。卽不得受生。豈能利物。是故忍受生死。不斷
 結。使三阿僧祇。處在生死。教化眾生。共出三界。不斷
 結。使意在此也。問曰。菩薩斷結誓願神通。應化利物。
 何必須畱結而受生耶。答曰。斷結誓願神通。應化受
 生。此乃是摩訶衍之所說。非三藏之所明也。所以者
 何。斷結誓願受生。通教之所說。法性身神通受生。別
 教之所說。法身應生。圓教之所說也。問曰。聲聞經何意
 不得論斷結受生。答曰。三藏之教。正化小乘。傍化菩
 薩。若說菩薩結盡受生。一乘卽疑。若結盡而得受生。

者諸聲聞人得羅漢果將不更受生耶。是故不說菩薩斷結受生也。問曰。若爲二乘疑。不說菩薩斷結受生者。大乘方等摩訶般若通教三乘亦應不說菩薩斷結用誓願神通受生也。答曰。此是生酥熟酥之教。二乘漸淳熟信解分明聞菩薩事。心不疑惑。故法華云。過此以後。心相體信。入出無難。然其所止。故在本處。問曰。所明聲聞經菩薩義。爲是佛說。爲佛去世後諸聲聞弟子說耶。答曰。有是佛說。亦有是諸羅漢作毗婆沙。阿毗曇中說也。問曰。何者是佛說。何者是羅漢說耶。答曰。如說菩薩從初發心。乃至不斷結使坐。

道場時正習俱斷。此是佛說。何以得知。龍樹論主答數人言。若後身菩薩不斷結者。是佛方便所說也。亦有是諸羅漢。佛去世後說者。如言初阿僧祇不自知作佛。二阿僧祇劫。自知作佛。而口不宣說。三阿僧祇劫。了了自知作佛。亦發言向他說。此義非佛三藏中所說。乃是羅漢作毗婆沙。釋菩薩義也。問曰。若佛自說三藏教。明菩薩義。此則可信。若諸羅漢所說。云何可信。答曰。諸羅漢既是聖人。共採佛三藏教意。明菩薩義。何容全失。問曰。若爾。智論何意從始至終。一一彈破。答曰。龍樹爲欲申摩訶衍。明菩薩所行之道。以

大破小。皆可破也。若就小乘明三藏宗途。羅漢聖人之所撰集。何容頓乖僻也。若諸羅漢明聲聞經。所釋菩薩義。遂併乖僻。末世凡人法師。何可謬有申釋。凡情解釋小乘。既不可承用。大乘深經。豈可出在妄情而論。故知雖非佛說。若是羅漢作論。亦須信受也。第二約通教辯位。以釋淨無垢義者。通教既詮因緣卽空之理。三乘同稟契理證道。必有淺深。故須判位。通教入道亦具四門者。一實門。二不實門。三亦實亦不實門。四非實非不實門。此四門入諸法實相。出智度論。中論雖不作門名四句。既能通行人入第一義。今

立門名觀其義意。今謂於理無失。至下辨體常略釋。
今判三乘同入第一義智斷之階級。此通教具有四
門入道而經論多用空門。若論逗機化物。隨緣而說。
四門豈可偏用。經論義便。事須如此。是故今約通教
明三乘位。正就空門以辨也。就此卽爲五意。一略明
半滿判位有同不同。二約通教開三乘。三正辨通教
三乘次位。四料簡五正約位。釋淨無垢稱義。一略明
半滿判同不同者。若三藏半字教門明位。大同小異。
如毗曇成實釋三藏教。辨賢聖位。雖復小異。而大意
是同。不足疑也。若摩訶衍滿字教門。通論祇是一摩

訶衍教。若細尋義理。卽有三教明位。高下不同。其不達大乘方便。實可疑也。故大品經云。有菩薩從初發心。卽與薩婆若相應。此恐約通教明入位。亦是法華經小樹增長之譬也。又大品經云。有菩薩從初發心。卽遊戲神通。淨佛國土。成就眾生。此恐約別教以明入位。卽是法華經大樹增長之譬也。又大品經云。有菩薩從初發心。卽坐道場。度眾生。當知是菩薩爲如佛。此恐約圓教明入位。亦是法華經一地所生之譬也。故大智度論。釋燈炷品云。有人言。乾慧地。初焰。佛地。爲後焰。有人言。歡喜地。爲初焰。佛地。爲後焰。有人

言初發心爲初焰。佛地爲後焰。如此解釋不同者。恐是諸大乘論師釋滿字教門。三教明位不同。各取此意以釋初後焰。問曰。何意三藏教明位多同。摩訶衍開爲三教。判位不同耶。答曰。半字教門。正明界內一世斷結。便入涅槃。小乘狹劣。明事淺近。不可動迭。若是滿字教門。廣大深遠。備明界內外行位法門。權實無方。諸菩薩行類相貌位次不同。無罣礙也。故涅槃經云。譬如隘道。不容二人並行。解脫不爾。多所容受。容受卽真解脫。真解脫內。權實行位。何所不容。故龍樹菩薩作大智論。種種因緣。破迦旃延引毗婆沙釋。

三藏義明菩薩義正是欲申摩訶衍教不可思議行
類階級隨緣不同也第二略明約通教開三乘者此
通教約因緣卽空之理分三乘也三人同稟通教見
第一義諦同斷三界見思得一切智同求有餘無餘
二種涅槃此義旣同故約通教義以辨位也而分爲
三乘者聲聞總相體法入空智慧力弱但斷正使根
性不同亦有二種解脫如前三藏教中分別緣覺福
德利根能少分別相體法入空生無佛世不因聞法
時至道熟自然曉悟見第一義斷三界結盡侵除習
氣是名辟支佛乘根性不同亦有二種一者小辟支

迦羅。二者大辟支迦羅。已如前說。若菩薩具修總相。別相智慧。體因緣卽空。起大悲誓願。以修諸行。見第一義。斷界內煩惱。用誓願扶習。還生三界。用道種智。遊戲神通。淨佛國土。成就眾生。三乘善根淳熟。卽坐道場。用一念相應慧。斷煩惱習盡。得一切種智。名之爲佛。轉生滅無生滅二種法輪。化三乘眾生。無餘涅槃。是爲大乘。故大品經云。三乘之人。同以第一義諦。無言說道。斷煩惱。但是煩惱習盡不盡爲異。又中論云。諸佛以甘露味。教化眾生。諸法實相。是真甘露味也。佛說實相。分爲三種。若得諸法實相。滅諸煩惱。名

聲聞乘。若生大悲。發無上意。名爲大乘。若佛滅度後。時世無佛。因遠離生智。名辟支佛乘。問曰。若爾與前三藏教明三乘何異。答曰。前已處處說。見第一義不殊。但教門有拙度巧度之別。觀門則有析體見真之殊。彼明菩薩從初發心。乃至補處。未言斷結。使此明菩薩從初發心。卽斷結。使乃至補處。正使斷盡殘習微薄。此爲大異。復次三藏教。約生滅四諦十二因緣六波羅蜜三法分三乘。今明通教則不如此。三乘同觀無生四諦。見第一義。而分三乘之別者。事如前解。三乘同體。假入空觀。十二因緣。見第一義。而分三乘。

之別者。事如前釋。三乘同觀六波羅蜜。見第一義而分別三乘之別者。如前分別。如此豈同三藏教之三乘也。問曰。菩薩可修六度。二乘何得亦同修六度耶。答曰。涅槃經云。福德莊嚴有爲有漏。是聲聞法。何處有慳貪聲聞。破戒瞋恚放逸散亂愚癡羅漢。辟支佛耶。但二乘之人不能徧行其事。成就眾生。何曾不同修六度。第一義諦無言說道而能斷結耶。問曰。上引中論所明。卽應是大乘聲聞緣覺也。答曰。不然。此雖通從太乘門入。而二乘取涅槃證。卽身滅度。故中論簡別得諸法實相。滅諸煩惱。名聲聞乘。若生大悲發

無上意名爲大乘。若佛不出世。辟支佛人。因遠離生智。此二既無大悲。何得名爲大乘。聲聞緣覺耶。故法華經身子自歎云。我等同入法性。云何如來以小乘法而見濟度。是我等咎。非世尊也。此則自述得法實相。非是大乘聲聞。若如迦葉領解。聞法華開權顯實云。我等今者。真是聲聞。以佛道聲令一切聞也。故不得言見諸法實相。卽是大乘聲聞。辟支佛也。第三正明通教三乘位者。卽爲二意。一明三乘共十地。二簡名別義通。一明三乘共行十地位者。卽爲二意。一標名。二解釋。一標名者。一乾慧地。二性地。三入地。四

見地。五薄地。六離欲地。七已辦地。八辟支佛地。九菩薩地。十佛地。故大品經云。菩薩從初乾慧地。至菩薩地。皆行皆學。而不取證。佛地亦學亦證。故言三乘通位也。二解釋者。釋乾慧地。三乘初心。通名乾慧地。乾慧地者。卽是三賢之位。一五停心。二別相念處。三總相念處。一五停心者。就此爲三意。一分別拙巧不同。二正明停心之位。三簡真僞。一分別拙巧不同者。三藏所明初賢。與通教不同也。彼約信解生滅四諦。修五停心。今約無生四諦。信解。修五停心。二種信解。旣拙巧不同。故入停心之位。目足不同也。二正明五停

心位所言賢者。本是鄰聖之義。亦是直善之名。今言直善。卽爲二意。一釋直義。二釋善義。一釋直義者。信解直正。異於外人邪僻。又不同拙度之曲。離此二邊。名之爲直。所以然者。三乘之人。同聞無生四諦。信解分明。故得然也。信無生苦諦者。信五陰十二入十八界不生。皆如夢幻響化。水月鏡像。畢竟空。無所有。是則解苦無苦。苦雖無苦。若不知無苦。則爲苦所苦。名曰愚夫。若知無苦。此則無苦而有真諦。信無生集者。了一切煩惱業行。皆如夢幻響化。水月鏡像。畢竟空。無所有。無和合相。若不知無所有。則有結業流轉。知

無所有是則解集無集是故無集而有真諦信無生滅諦者知一切生滅之法皆不可得設使有法過於涅槃亦如夢幻響化水月鏡像本自不生今亦無滅若不知不生不滅則生滅終不自滅若知不生不滅則生滅自然而滅是則有真諦也信無生道諦者信一切至涅槃道皆如夢幻響化水月鏡像無有二相是則不見通與不通若見有二有通不通則成壅塞若知不二之相不見通與不通則任運虛通入第一義是則知道有道而有真也若三乘之人初入佛法信解此語分明名正直心但菩薩因此無生四諦起

慈悲誓願故名摩訶薩也。問曰：若知諸法皆無所有，是則不見真與不真，何須結無生四真諦之名也？答曰：此約思益經涅槃制義，非凡情自立得意忘言，無生四真之名，何足疑礙？二釋善義者，卽是五停心之善法也。此之五法能發諸禪，禪名弃惡亦名功德叢林，止行二善無過於禪。禪因五法，此之五法內善之本也。行人初心信解雖真，但以五種不善隨其重著，牽心馳散，不得暫停。如風中燈，照物豈了？欲知因緣卽真，必須一心禪寂，如水澄清，珠相自現，是故覺觀多者，教令數息。因數息故，心不動散，得欲界定，住未

到地能發初禪。乃至四禪。四無色定。如明鏡不動。如淨水無波。目足備故。入清涼池。是名直善。直善之人。能發無漏。故說鄰聖曰賢也。是以大品經云。阿那波那。卽是菩薩摩訶衍。以不可得故。此約初停心。明賢人乾慧地之位。不淨觀對破貪欲。明停心入初賢乾慧之位。亦如是。故大品經云。不淨觀卽菩薩摩訶衍。以不可得故。慈心界方便因緣。明停心入初賢乾慧之位。亦如是。三簡真僞者。問曰。三乘初心。信解無生四諦。有真僞不答。迦羅迦果。鎮頭迦果。僞多真少。於末世學三乘之人。雖知無生四諦。不識正因緣義。卽

是迦羅迦果。若無道心。貪著名利。卽是迦羅迦果。不知善巧修習止觀。卽是迦羅迦果。破法不徧。卽是迦羅迦果。不知通塞。卽是迦羅迦果。不知道品調適。進趣修習。卽是迦羅迦果。不知對治。助開三解脫門。卽是迦羅迦果。不知位次。生增上慢。卽是迦羅迦果。不能安忍。內外強軟。兩賊卽是迦羅迦果。是則迦羅迦果。乃有九分。如女人不別。將還家食。眷屬皆死。若能了知畢竟無所有。而精解此之得失。發諸順道法門。而不愛著。卽是鎮頭迦果。纔有一分也。故中論云。佛去世後。人根轉鈍。聞大乘法中。說畢竟空。不知何因。

緣故空。卽生見疑。若都畢竟空。云何分別有罪福報應等。如是則無世諦第一義諦。取此空相而生貪著。於畢竟空中。生種種過。龍樹菩薩造論。意在此也。智論云。第三邪見。破因緣果報。亦破一切法。與觀真空。何異。龍樹論八翻復次。簡別真僞。具出云。問曰。五停心善法。有真僞不。答曰。一家次第禪門。明發禪覺。支若過不及。有二十種壞禪邪覺。卽是迦羅迦果。十種成禪善覺。卽是鎮頭迦果也。問曰。信解無生四諦。智慧辯才。卽是般若。何須數息五停心觀邪。答曰。大智論云。空無相無作。雖是智慧。若無定心。卽是顛智。

慧狂智慧。豈可說顛狂之人。是初賢乾慧地耶。二明別相四念處。乾慧地位者。三乘之人。住靜定心。修三種念處。事相略如前三藏教分別。但此通教所明性念處。但觀五陰卽空。法性智慧。名爲性念處。是以大品經說。卽色是空。非色滅空。色性自空。空卽是色。離空無色。離色無空。受想行識。亦復如是。若觀此屬愛屬見。身邊二見。四見。十四見。及一切諸色。皆不淨。虛妄不實。本自不生。破色四邊見。無生有四十八番。乃至九十六番。類前體假入空觀可知也。不生卽是空。空卽法性。法性非垢非淨。卽破垢淨二倒。是真不淨。

義名身念處。若觀屬見一切諸受皆苦。虛妄不實。本自不生。破受四邊見。無生有四十八番。乃至九十六番。類前可知也。不生卽空。空卽法性。法性非苦非樂。破苦樂倒。是真苦義。名受念處。若觀屬愛屬見一切心皆無常。虛妄不實。本自不生。破心四邊見。無生四十八番。乃至九十六番。類前可知也。不生卽空。空卽法性。法性非常非無常。卽破常無常倒。是真無常義。名心念處。若觀屬愛屬見一切想行二陰皆無我。虛妄不實。本自不生。破想行四邊見。無生有四十八番。乃至九十六番。類前可知也。不生故卽空。空卽法性。

法性非我非無我。卽破我無我倒。是真無我義。名法
念處也。三乘之人。觀五陰第一義諦。修四念處時。四
念處中。四種精進。名正勤。四種禪定。名四如意足。信
等五種善生。名之爲根。善根增長。遮諸煩惱。名之爲
力。分別道用。名爲七覺。安隱道中行。名八正道。此性
四念處對破身邊二見。四邊見。無生結成四十八番。
乃至九十六番。明二十一心。無生四念處。意甚難解。
自非徹思。終不可見。若修共念處。事相如前。但以騰
相脹相爛相壞等相背捨勝處。皆如夢幻。畢竟不可
得爲異也。若修緣念處。分別名義如前。但知名字性。

離卽解脫相。無句義。是菩薩句義。如是通達一切名義。卽是緣念處。三乘人修此三種念處。皆以正勤如意足根力覺道善巧調適觀五陰一切諸法。不取不捨。能伏一切屬愛屬見。八十八使。三界二十五有一切結集。故言善滅諸戲論也。略說三乘通觀別相四念處。住乾慧地。但菩薩雖知五陰畢竟空寂。而大悲誓願。不捨眾生。以無所得。調伏諸根。修行六度。卽是摩訶衍。故大品經云。四念處。是菩薩摩訶衍。以不可得故。問曰。通教性念處。理既是通破八倒。何須別對答曰。三藏教別相四念處。既別破四倒。明乾慧地位。

既是齊對其別破拙。但破四倒。今明別破之巧。故還用別以破八倒也。三明總相四念處乾慧地位者。總相三種四念處。如前三藏教分別。但以如幻如化體法。卽空爲異耳。是爲無生總相四念處。住是總相念處中。若修身念處。卽觀五陰十二入十八界一切諸法。總破八倒。是名身念處。受心法念處亦如是。住是總相四念處。修正勤如意足根力覺道。雖未發暖法。相似無漏法水。而總相觀五陰智慧深利。勝別相四念處。是則名總相四念乾慧地外凡之位也。問曰。三乘人通觀第一義諦。同破八倒。應同見佛性。何故通

教人入二涅槃也。答曰。破八倒有四種意。一破八倒不結枯榮。是則通別圓不定。二破八倒結成四枯定。成通教。三破八倒結四榮定。成別教。四破八倒結枯榮。卽是圓教。今明破八倒用淨名訶迦旃延破三藏五義說摩訶衍五義。卽結成四枯。故二百比丘心得解脫。正屬通教意也。二明性地。若因總相念處成三十七品。初發善有漏五陰名暖法。暖法義如前說。增進初中後心。入頂法忍法。乃至世第一法。名爲性地。內凡性地之義。皆如前說。但以從乾慧地。習無生方便異。故所論性地。初中後心解慧善巧。亦有殊別。拙

巧雖復不同。而俱伏界內見諦之惑也。三明八人地者。卽是三乘信行法行人。體見假以發真。斷見諦惑。在無間三昧。卽八人之位也。四見地者。卽是三乘同見第一義無生四諦之理。同斷見惑八十八使盡也。問曰。上明體法入空。破屬愛屬見。今何故見惑前盡。屬愛在後方斷。答曰。見新愛舊。體假入空。雖復俱破。見則易盡。愛則難除。譬如斷藕。若手折斷藕。斷絲連。若用刀斷藕。絲俱絕。次第證果之人。見惑雖盡。思惑猶在。超證之人。則見思俱斷也。五薄地者。體愛假卽真發六品無礙。斷欲界六品。證第六解脫。欲界煩惱。

薄也。六離欲地者。卽是三乘之人。體愛假卽真。斷欲界五分結盡。離欲界煩惱也。七已辦地。卽是三乘之人。體色愛無色愛卽真。發真無漏。斷五上分結。七十二品盡也。斷三界事惑究竟。故言已辦地也。八辟支佛地者。緣覺發真無漏。功德力大。故能侵餘習也。九菩薩地者。從空入假。道觀雙流。深觀二諦。進斷習氣。色等無明。得成界外法眼。道種智。遊戲神通。淨佛國土。成就眾生。學佛十力。四無所畏。十八不共法。大慈大悲。斷習氣將盡也。十佛地者。大功德力。資智慧。一念相應慧。觀真諦究竟。習氣究竟盡也。故智度論云。

聲聞智慧力弱。如小火燒木。雖然猶有炭在。緣覺智慧力勝。如大火燒木。木然炭盡。餘有灰在。諸佛智慧力大。如劫燒火。灰炭俱盡。亦如兔馬象三獸度河之諭也。問曰。菩薩佛地。名異二乘。何得言通也。答曰。名雖有異。同是無學應供。得二涅槃。其歸灰斷。證果是一。名義不殊。是則名義究竟俱同也。二簡名別義通者。卽爲二意。一約前三乘共十地。菩薩別立忍名。二明用別教名。名別義通。一明用通教位立別位。名別而義通者。義通已如前說。今言名別者。別爲菩薩立伏忍柔順無生忍之名也。所以者何。乾慧地三乘同。

伏見惑而菩薩別受伏忍之名者。菩薩信因緣卽空而於無生四諦降伏其心。起四弘誓願。雖知眾生如虛空而發心度一切眾生。是故度眾生如度虛空。故金剛般若經云。菩薩應如是降伏其心。所謂滅度無量無邊眾生。實無眾生得滅度者。次明誓願降伏心亦如是。故在乾慧修停心時。別名爲伏忍。異二乘也。別相總相念處。皆名伏忍。亦如是。復次三乘之人。同發善有漏五陰生相似解。皆能柔伏見惑。順第一義諦理。而菩薩獨受柔順忍名者。菩薩非但伏結順理。又能爲一切眾生伏心。徧行六度。一切事中。福德智

慧皆令究竟如三藏教門三阿僧祇修六度乃至不惜身命至中忍滿今此菩薩亦如是以空無相無願調伏諸根欲爲眾生滿足六度故名柔順忍也復次三乘之人同發真無漏若智若斷同名無生而菩薩獨受無生法忍名者以其見第二義諦雖斷結使而不生取證之心故別受無生法忍之名也所以者何若生取證心卽墮二乘地不得入菩薩第九地復次三乘同得神通而二乘不能用神通成就眾生淨佛國土故不得受遊戲之名菩薩能爾故名菩薩受遊戲神通之名阿那含雖斷五下分結而不能捨深禪

定。來生欲界。和光利物。而不同塵。菩薩能如是。故別說爲離欲清淨也。問曰。通教三乘。同觀二諦。約位云何分別。答曰。二乘雖觀二諦。一向體假入空。用真斷結。至無學果。菩薩亦觀二諦。始從乾慧。終至見地。多用從假入空觀。得一切智慧眼。多用真也。從薄地學遊戲神通。多修從空入假觀。得道種智法眼。多用俗也。從辟支佛地。學二觀淳熟。雙照二諦。入菩薩地。自然流入薩婆若海。是則無功用心。修種智佛眼。佛地圓明。成一切種智。佛眼圓照。二諦究竟也。故大智論云。聲聞法中名乾慧地。於菩薩卽是伏忍。聲聞法中

名性地。於菩薩法中名柔順忍。於聲聞法名八人地。於菩薩法名無生忍。於聲聞法名爲見地。於菩薩法。是無生法忍果。聲聞法名薄地。於菩薩法名爲遊戲。五神通。聲聞法名離欲地。於菩薩法名離欲清淨阿羅漢地。於聲聞法卽是佛地。三藏佛三十四心發真斷。三界結盡。與羅漢齊也。大品經云。阿羅漢若智若斷。是菩薩無生法忍。大品經云。辟支佛若智若斷。是菩薩無生法忍。卽對菩薩八地。侵除習氣。九過辟支佛地。入菩薩位。菩薩位者。九地十地。是則十地菩薩。當知如佛。齊此習氣未盡。過菩薩地。則入佛地。用誓。

願扶習氣。生閻浮提。八相成道。五相如前。料簡大小。乘同異。如智度論分別。六成道相者。菩提樹下。得一念相應慧。與無生諦理相應。斷一切煩惱習盡。具足大慈大悲。十力四無所畏。十八不共法。四無礙智。一切功德智慧者。名之爲佛。七轉法輪相者。權智開三藏生滅四諦法輪。實智說摩訶衍無生四諦法輪。通三乘人也。八入涅槃相者。雙樹入無餘涅槃。如薪盡火滅。畱舍利爲一切人天福田也。是名通教大乘八相成道。是則三乘之人。同見真諦之理。同得二種涅槃。但大乘有八相成道之異。是爲通教大乘。別爲菩

薩立名位也。二明用別教別位名。名別而義通者。卽是三乘同觀第一義諦之理。取別教之名。辯菩薩位也。就此則爲二意。一正約名別義通判位。三料簡。一正約名別義通辨位者。卽是十信三十心十地之名也。鐵輪位卽是乾慧位伏忍。三十心卽是性地柔順忍。八人地見地卽是初歡喜地得無生忍。故大品經云。須陀洹若智若斷。是菩薩無生法忍。薄地向果。向卽離垢地。果卽發光地也。故大品經云。斯陀含若智若斷。是菩薩無生法忍。阿那含地向果。向卽炎地。果卽是難勝地。故大品經云。阿那含智斷。是菩薩無生

法忍。羅漢地向果。向是現前地。果是遠行地。故大品經云。阿羅漢智斷。是菩薩無生法忍。辟支佛地。卽是第八不動地。侵除習氣也。故大品經云。辟支佛智斷。是菩薩無生法忍。菩薩地。卽是第九善慧地。十法雲地。當知如佛。佛地如前說。坐道場時。一念相應。斷二障。習氣盡。所謂煩惱障。法障之習氣也。化一切有緣眾生。竟入無餘涅槃。如薪盡火滅。八相成道。如前說。是則用別教名。辨位名異。而義同。猶屬通教之位也。第二料簡者。問曰。從初地至七地。對四果。出何經論耶。答曰。經論非不對當。但高下不同。末代法師對當。

亦多殊異。所以然者。或云見地止對初地。此如今所用。或取三地併對見地。仁王經明四地併對見地。此則難可定依。但通教見地。本は無間之道。不出觀證。須陀洹。豈得從初地斷見。乃至三地。或云四地耶。若斷別惑。不共二乘。如此明義。或當有之。又或言六地斷結。與羅漢齊。或云七地名阿羅漢。此難定執。前後兩果。經論對既不定。其間二果。以意可知。既不可定依。今用義推。作此對位。雖一往小便。終不可定執也。